

- Ih méinu scā Máriun, kúningin thia ríchun:  
 sia ist éngilo ménigi in himile érenti.  
 So uuer sō in érdriche ouh sálda suache,  
 irbiat er ira gúati mihilo ótmuati.  
 35 Fon ánagenge uuórolti unz anan ira ziti  
 zéli du thaz kúnni, so ist éinlif stunton sibini.  
 Iro dágo uuard giuuágo fon alten uuizagon,  
 thaz si uns bérán scolti thér unsih gihéilti,  
 Giuuhtan in éuon; ginádot er uns then sélon  
 40 ioh állero uuórolti, so nu mánnilih ist séhenti.  
 Sih thaz héroti, theist imo thíomuati  
 so uuito soso uuórolt ist, uuant er ther drúhtin ist;  
 Er ist giuuéltig filu frám, ioh héra in uuorolt zī úns quam,  
 uuúntarlichen thíngon hera untar ménnisgon. —  
 45 Thaz uuíll ih hiar gizéllen gidríuuen sinen állen,  
 so uuír nu hiar bigínnen, uuorton frénkisgen.  
 Tho scribih hiar nu zi érist, so in euangélión iz íst,  
 uuio gibóran uuard ouh ér Iohánnes, thégan siner,  
 Ther imo ingegin gárota thaz uuórolt missiuórahta:  
 50 thie uuega ríht er imo ubarál, so man héréren scal.

## 7. IV. Fuit in diebus Herodis regis sacerdos nomine Zacharias.

- In dágon eines kúninges, ioh háрто frídánes,  
 uuas ein éuuarto: zi gúate sj er ginánto!  
 Zi híun er mo quénun las, so thár in lante sítu uuas:  
 uuanta uuárun thánne thie biscofa éinkunne.  
 5 Uuárun siu béthju góte filu drúđu  
 ioh íogiuuar sínaz gibot fúllentaz,  
 Vuizzod sinan ío uuírkendan  
 ioh reht mínmonti ana méindati.  
 Vnbera uuas thiu quéna kindo zéizero;  
 10 so uuárun se unzan élti thaz lib léitendi.  
 Zít uuard tho giréisot, thaz er giangi furi gót:  
 ópphoron er scólta bi die síno súnta;  
 Zi góte ouh thanne thígiti, thaz er giscóuuoti  
 then líut, ther gináda tharuze béttota.  
 15 Thiu hériscaf thes líutes stuant thar úzuertes,  
 sie uuárun iro hénti zi gote héffenti:  
 Sineró éregrehti uuárun thíggenti,  
 tház er ouh gihórti thaz ther éuuarto bati.  
 Ingiang er tho skíoro góldo garo ziero,  
 20 mit zínseru in hénti thaz hus róuhenti.  
 Thár gisah er stántan gótes boton sconan  
 zi thes álteres zésauni: uuas sin béitonti.  
 Hintarquam tho háрто ther gotes éuuarto,  
 intríat er thaz gisiumi, uuant íz uuas filu scóni;  
 25 Er írbléicheta ioh fárauuun er uuánta.  
 ther éngil imo zúasprah, tho er nan scíuhen gisah: